



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726-444
fax. +387 33 726-423
e-mail: info@voda.ba

Broj: **UP-1/21-1-40-128-6/24**
Datum: **14.05.2024. godine**

«Agencija za vodno područje rijeke Save» Sarajevo rješavajući po službenom zahtjevu Ministarstva za prostorno uređenje, promet i komunikacije i zaštitu okoline Zeničko-dobojskog kantona za donošenje rješenja o prethodnoj vodnoj saglasnosti za sanaciju postojeće deponije komunalnog otpada «Bare» u Kaknju i izgradnju pratećih sadržaja prilagođenih regionalnom konceptu odlaganja otpada a u postupku pribavljanja urbanističke saglasnosti po zahtjevu pravnog lica JP «VODOKOM» d.o.o. Kakanj, na osnovu člana 109. stav (1) tačka 11. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22), donosi

RJEŠENJE **o prethodnoj vodnoj saglasnosti**

1. Daje se prethodna vodna saglasnost pravnom licu JP «VODOKOM» d.o.o. Kakanj za sanaciju postojeće deponije komunalnog otpada «Bare» i izgradnju pratećih sadržaja prilagođenih regionalnom konceptu odlaganja otpada na lokalitetu «Bare» na parcelama označenim kao k.č. broj 2086/3 i 2087/2 K.O. Bukovlje i k.č. broj 1281 Čatići, općina Kakanj, a u postupku pribavljanja urbanističke saglasnosti i okolinske dozvole ukoliko je za predmetni objekat i aktivnost potrebna okolinska dozvola.
2. Ova prethodna vodna saglasnost ne oslobađa podnosioca zahtjeva obaveze pribavljanja prethodne vodne saglasnosti za zahvatanje vode, ispuštanje sanitarnih otpadnih voda iz pratećih objekata deponije, za izgradnju pristupne saobraćajnice i drugih aktivnosti koje se planiraju izvoditi na predmetnom lokalitetu, a koje su navedene u članu 17. stav (2) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj 31/15, 55/19, 41/20 i 63/22) a za čije izdavanje je nadležno Ministarstvo za poljoprivredu, šumarstvo i vodoprivredu Zeničko-dobojskog kantona, u skladu sa članom 139. stav (2) tačka 1. i 2. Zakona o vodama ili općina, ukoliko je kantonalnim propisom prenesena nadležnost na općinu, shodno stavu (3) istog člana zakona.
3. Prethodna vodna saglasnost se daje na osnovu pregleda dostavljene dokumentacije, utvrđenog činjeničnog stanja i pod sljedećim uslovima:
 - 3.1. Da je planirana aktivnost usklađena sa važećom prostorno-planskom dokumentacijom i razvojnim planovima Općine Kakanj.
 - 3.2. Da se u okviru projektnog rješenja primjene tehničko-tehnološke mjere kojima će se spriječiti kontaminacija vode, tla i zraka. Sanacija predmetne deponije mora biti u skladu sa zakonskim propisima i standardima EU te sa propisima i zakonima FBiH prema principima savremene multibarijerske zaštite.
 - 3.3. Da se na osnovu provedenih istražnih radova, rekognosciranja terena, provedenog monitoringa voda, utvrđenog stanja izgrađenih infrastrukturnih objekata na deponiji i utvrđenog uticaja deponije na okoliš, površinske i podzemne vode, zemljište i zrak izradi Investiciono-tehnička dokumentacija za izgradnju sistema za prikupljanje, prečišćavanje i ispuštanje tehnoloških otpadnih voda u okoliš (procjednih voda iz tijela deponije, oborinskih voda, zauljenih voda sa platoa i dr.) a u postupku sanacije postojeće deponije definisane tačkom 1. ovog rješenja.
 - 3.4. U Investiciono-tehničkoj dokumentaciji treba biti priložena situacija terena u odgovarajućem mjerilu sa ucrtanim širim područjem deponije, obodnim i drenažnim kanalima, bazenima tehničke i procjedne vode, mrežom monitoring mjesta i prikazom do sada obavljenih ispitivanja kvalitativnih i kvantitativnih karakteristika procjednih voda iz tijela deponija, površinskih voda i podzemnih voda, izvorišta vode za piće, a sve u cilju utvrđivanja trenutnog stanja voda i odabira tehnologije prečišćavanja procjednih voda iz tijela deponije a prije ispuštanja u recipijent/okoliš.

3.5. Investiciono-tehnička dokumentacija treba biti urađena i revidovana od strane pravnih lica koja imaju ovlaštenja (lista «A») pribavljena od strane Federalnog ministarstva poljoprivrede, vodoprivrede i šumarstva i treba da obradi sva pitanja definisana članom 5. stav (2) Pravilnika o sadržaju, obliku, uslovima, načinu izdavanja i čuvanja vodnih akata koja su bitna za konkretan slučaj, a naročito:

- proračun količina i sastava tehnoloških otpadnih voda sa relevantnim parametrima potrebnim za projektovanje novog drenažnog sistema i postrojenja za prečišćavanje tehnoloških otpadnih voda;
- tehničko rješenje izgradnje drenažnog sistema za prikupljanje procjednih voda sa prostora deponije sa definisanim načinom izgradnje sabirnog bazena/lagune za prihvatanje prikupljenih procjednih voda te načinom prečišćavanja i mjestom ispusta prečišćenih voda u okoliš (ili povrat efluenta na tijelo deponije);
- usvojenim sistemom prečišćavanja tehnoloških otpadnih voda mora se obezbijediti da prečišćene otpadne vode, prije ispuštanja u krajnji recipijent zadovolje granične vrijednosti emisija otpadnih voda definisane u prilogu 19. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20);
- predvidjeti ugradnju okna za monitoring prije ispusta prečišćenih voda u recipijent;
- dati osnovne podatke o recipijentu, sa detaljem ispusta prečišćenih voda u isti. Lokalizacija ispusta prečišćenih voda mora biti naznačena na situaciji adekvatne razmjere, kao i mjesto vršenja monitoringa prečišćenih voda (okno za uzimanje uzoraka);
- tehničko rješenje zbrinjavanja mulja iz postrojenja za prečišćavanje tehnoloških otpadnih voda;
- tehničko rješenje izgradnje sistema za sprečavanje prodora okolnih površinskih voda u tijelo deponije (obodni kanali) sa definisanim mjestom ispuštanja prikupljenih oborinskih voda u utvrđeni recipijent;
- tehničko rješenje izgradnje drenažnog sistema po obodu postojeće deponije za prikupljanje eventualnog filtrata iz tijela;
- tehničko rješenje sistema za prikupljanje i prečišćavanje oborinskih onečišćenih voda sa platoa, radnih površina deponije kao i zauljenih voda sa internih saobraćajnih, parking i površina za popravak i održavanje mašina sa načinom i mjestom ispuštanja prečišćenih voda u utvrđeni recipijent;
- tehničko rješenje sistema za ucjevljenje potoka koji protiče kroz deponiju;
- tehničko rješenje otplinjavanja tijela deponije;
- prijedlog lokacije pozajmišta zemlje za izradu rekultivirajućeg sloja deponije;
- prijedlog programa monitoringa površinskih i podzemnih voda te procjednih voda iz tijela deponije nakon izvršene sanacije sa grafičkim prikazom monitoring mjesta, brojem uzorkovanja, parametrima kvaliteta i njihovim graničnim vrijednostima (MDK) i dr., a sve u cilju praćenja uticaja deponije na stanje voda a posebno na postojeća i planirana izvorišta vode za piće ukoliko se ista nalaze na predmetnom području;
- sagledati sve moguće neželjene uticaje planiranih radova na sanaciji predmetne deponije na režim površinskih i podzemnih voda, postojeću infrastrukturu, druge objekte i postrojenja, stečena prava korisnika, naselja i slično, te dati prijedlog mjera za sprečavanje tih uticaja.

3.6. Projektnom dokumentacijom otkloniti mogućnost privremenog i trajnog odlaganja opasnog otpada uz vodotoke, u području izvorišta vode za piće i sl.

3.7. Projektnom dokumentacijom definisati da se opasni materijal i otpad, kako u toku izvođenja radova tako i u toku rada predmetne deponije ne smije ni privremeno odlagati na česticu «vodno dobro», odnosno u vodotok i na njegove obale.

3.8. Pri izradi tehničke dokumentacije pridržavati se uslova iz Urbanističke saglasnosti, zakonske regulative vezane za ovakvu vrstu radova, ekološko-ekonomskih zahtjeva.

3.9. Investiciono tehnička dokumentacija mora biti urađena na nivou glavnog projekta potrebnog za pribavljanje odobrenja za građenje te u skladu sa uslovima iz ove prethodne vodne saglasnosti i uslovima ostalih nadležnih organa ukoliko isti nisu u suprotnosti sa uslovima iz ovog Rješenja.

4. Ovu prethodnu vodnu saglasnost će Investitor koristiti u postupku pribavljanja urbanističke saglasnosti i okolinske dozvole i ona definiše sve uslove koje Investiciono-tehnička dokumentacija treba ispuniti za pribavljanje vodne saglasnosti, a sve u skladu sa Zakonom o vodama i provedbenim dokumentima, Pravilnikom o sadržaju, obliku, uslovima, načinu izdavanja i čuvanja vodnih akata, («Službene novine Federacije BiH» broj 31/15, 55/19, 41/20 i 63/22).
5. Po izradi i reviziji investiciono-tehničke dokumentacije u skladu sa uslovima iz tačke 3. dispozitiva ovog Rješenja, a prije pribavljanja odobrenja za građenje, korisnik prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti na izrađenu projektnu dokumentaciju.
6. Zahtjev za izdavanje vodne saglasnosti dostavlja se u skladu sa članom 8. i 19. stav (2) Pravilnika o sadržaju, obliku, uslovima, načinu izdavanja i čuvanja vodnih akata. Uz zahtjev se prilaže:
 - 6.1. Revidovana Investiciono-tehnička dokumentacija urađena na nivou glavnog projekta i u skladu sa uslovima iz dispozitiva ovog rješenja
 - 6.2. Rješenje o urbanističkoj saglasnosti i okolinskoj dozvoli
 - 6.3. Dokaz o izvršenoj uplati upravne takse u iznosu od 60 KM.
7. Ova prethodna vodna saglasnost se daje sa rokom važenja od 3 (tri) godine od dana pravosnažnosti rješenja i ista prestaje da važi ukoliko ne bude pribavljena urbanistička saglasnost i ne bude podnesen zahtjev za izdavanje vodne saglasnosti.
8. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, odnosno kantonalno ministarstvo, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
9. Ovo rješenje o prethodnoj vodnoj saglasnosti može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Ministarstvo za prostorno uređenje, promet i komunikacije i zaštitu okoline Zeničko-dobojskog kantona u postupku izdavanja urbanističke saglasnosti za radove na sanaciji postojeće deponije komunalnog otpada «Bare» i izgradnju pratećih sadržaja prilagođenih regionalnom konceptu odlaganja otpada na lokalitetu «Bare» na parcelama označenim kao k.č. broj 2086/3 i 2087/2 K.O. Bukovlje i k.č. broj 1281 Čatići, općina Kakanj a po zahtjevu Investitora JP «VODOKOM» d.o.o. Kakanj, uputilo je po službenoj dužnosti dana 13.03.2024. godine zahtjev za izdavanje prethodne vodne saglasnosti za predmetnu sanaciju nadležnoj «Agenciji za vodno područje rijeke Save» Sarajevo.

Uz zahtjev nije bila dostavljena dokumentacija koja je propisana članom 19. stav (2) Pravilnika o sadržaju, obliku, uslovima, načinu izdavanja i čuvanja vodnih te je dopisom broj: UP-1/21-1-40-128-2/24 od 14.03.2024. godine zatraženo od podnosioca zahtjeva da istu dopuni što je i urađeno u ostavljenom roku.

U provedenom postupku, uz zahtjev za izdavanje prethodne vodne saglasnosti dostavljena je i pregledana sljedeća dokumentacija:

- Ovjerena kopija Aktuelnog izvoda iz sudskog registra broj: 043-0-RegZ-24-000656 izdatog dana 04.03.2024. godine od strane Općinskog suda u Zenici,
- Ovjerena kopija Uvjerenja o poreznoj registraciji izdatog dana 15.08.2011. godine od strane Porezne uprave – Kantonalni ured Zenica,
- Kopija Uvjerenja o registraciji/upisu u Jedinstveni registar obveznika indirektnih poreza broj: 04/1-17-1-35-230-4/12 izdatog dana 11.04.2012. godine od strane Uprave za indirektno-neizravno oporezivanje Banja Luka,
- Kopija Rješenja o prethodnoj vodnoj saglasnosti broj: UP-I/25-1-40-573-6/15 izdatog dana 07.12.2015. godine od strane «Agencije za vodno područje rijeke Save» Sarajevo,
- Kopija Zaključka o odbacivanju zahtjeva za vodnom saglasnosti broj: UP-I/25-1-40-015-6/20 izdatog dana 06.07.2020. godine od strane «Agencije za vodno područje rijeke Save» Sarajevo,

- Kopija zahtjeva za izdavanje urbanističke saglasnosti broj: 1400-5/24 poslanog dana 12.02.2024. godine Ministarstvu za prostorno uređenje, promet i komunikacije i zaštitu okoline Zeničko-dobojskog kantona,
- Kopija Mišljenja sa izvodom iz planskog dokumenta broj: 01/1-212/24 izdatog dana 27.02.2024. godine od strane Službe za privredu, urbanizam i zaštitu okoline Općina Kakanj,
- Kopija Posjedovnog lista broj 1088 za parcele označene kao k.č. broj 2086/3 i 2087/2 K.O. Bukovlje od strane izdatog dana 09.02.2024. godine od strane Službe za imovinsko pravne, geodetske poslove i katastar nekretnina Općina Kakanj,
- Kopije Rješenja o promjenama u katasatrskom operatu broj: 06/2-26-745/24-8 i broj: 06/2-26-745/24-15 izdatih dana 06.02.2024. godine od strane Službe za imovinsko pravne, geodetske poslove i katastar nekretnina Općina Kakanj,
- Idejni projekat sanacije postojeće deponije komunalnog otpada općine Kakanj i izgradnja pratećih sadržaja prilagođenih regionalnom konceptu odlaganja urađen od strane «Saraj inženjering» d.o.o. Sarajevo, mart 2015. godine,
- Glavni projekat sanacije postojeće deponije komunalnog otpada općine Kakanj i izgradnja pratećih sadržaja prilagođenih regionalnom konceptu odlaganja urađen od strane «Saraj inženjering» d.o.o. Sarajevo (Knjiga «A» i «B»), juni 2016. godine,
- Dokaz o uplati upravne takse.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i članom 21. Pravilnika o sadržaju, obliku, uslovima, načinu izdavanja i čuvanja vodnih akata o zahtjevu je dana 01.04.2024. godine obavještena javnost putem obavještenja na oglasnim pločama «Agencije za vodno područje rijeke Save» u Sarajevu i u Uredu u Zenici, te dana 04.04.2024. godine u dnevnom glasilu «OSLOBOĐENJE». U datom roku nije bilo pisanih izjašnjenja o predloženim aktivnostima iz zahtjeva. U datom roku nije bilo pisanih izjašnjenja o predloženim aktivnostima iz zahtjeva.

Na osnovu uvida u dostavljenu dokumentaciju utvrđeno je:

Deponija komunalnog otpada «Bare» nalazi se na udaljenosti cca 2,4km istočno od središta općine Kakanj iznad naselja Bare na parcelama označenim kao k.č. broj 2086/3 i 2087/2 K.O. Bukovlje i k.č. broj 1281 Čatići, općina Kakanj. Deponija je otvorenog tipa i ne zadovoljava uvjete sanitarnih deponija tj. ima negativne uticaje na vode, zrak, zemljište, floru i faunu.

Da bi se izvršila sanacija predmetne deponije potrebno je uraditi niz mjera i aktivnosti što uključuje izgradnju svih objekata koji treba da osiguraju kvalitetno i sigurno funkcionisanje deponije kako bi predmetni kompleks deponije udovoljio regulativi Federacije BiH. Da bi se realizovali postavljeni ciljevi i implementirali predviđeni zadaci planirano je sljedeće:

- sanacija postojeće deponije na način da su zadovoljene najsavremenije norme i standardi u tom postupku koji se primjenjuje u zemljama EU,
- izgradnja sistema za prihvatanje i tretman procjednih voda,
- izgradnja sistema odvodnje površinskih (oborinskih) voda,
- izgradnja sistema za otplinjavanje deponije,
- izgradnja i uređenje površine na kojoj će se omogućiti jednostavno odvajanje odnosno privremeno deponovanje otpada (reciklažno dvorište),
- izgradnja infrastrukture (pristupni prijemni plato, unutrašnje komunikacije, parking prostor...),
- izgradnja prostora za radnike sa potrebnim sanitarijama, portirnica, kamionska vaga,
- izgradnja zaštitne ograde oko deponije,
- izgradnja sistema protivpožarne zaštite,
- uvođenje i provođenje odgovarajućeg monitoringa,
- uređenje prostora za pretovarnu stanicu i reciklažno dvorište nakon zatvaranja deponije,
- rekultivacija zemljišta.

Da bi se saniralo cijelo područje i eliminisao uticaj predmetne deponije na okoliš, potrebno je izgraditi kompleks deponije što će se uraditi u nekoliko faza.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, kao i onemogućavanja degradacije kvaliteta voda, podnosiocu zahtjeva su ovim vodnim aktom, u tački 3. dispozitiva rješenja, shodno odredbama Zakona o vodama, Pravilnika o sadržaju, obliku, uslovima i načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije propisani uslovi koje je podnosilac zahtjeva JP «VODOKOM» d.o.o. Kakanj dužan ispuniti prilikom izrade projektne dokumentacije za sanaciju postojeće deponije komunalnog otpada «Bare» i izgradnju pratećih sadržaja prilagođenih regionalnom konceptu odlaganja otpada na lokalitetu «Bare» a koja će biti potrebna u postupku pribavljanja vodne saglasnosti i odobrenja za građenje.

Na osnovu prednjeg i provedenog postupka, a shodno odredbama člana 111. Zakona o vodama i člana 5. Pravilnika o sadržaju, obliku, uslovima, načinu izdavanja i čuvanja vodnih akata, doneseno je rješenje kao u dispozitivu.

Podnosilac zahtjeva je uplatio upravnu i administrativnu taksu u iznosu od 80 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi («Službene novine Federacije BiH» broj: 06/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta

Nermina Hodžić, dipl.ing.grad.

za Po ovlaštenju
Rukovodilac sektora za izdavanje
vodnih akata



Haris Ališepović, dipl.ing.grad.

Dostaviti:

- JP «VODOKOM» d.o.o. Kakanj
ul. Alije Izetbegovića br 51/I, 72000 Kakanj
- Ministarstvo za prostorno uređenje, promet i komunikacije i zaštitu okoliša
Zeničko-dobojskog kantona, Kućukovići br 2, 72000 Zenica
- AVP Sava, ISV-vodna knjiga
- ⊙ Sektor 40 – arhiva
- Oglasna ploča AVP Sava